


周易集解
二





周易集解

(二)

孫星衍撰

周易集解卷二

上經屯傳第二

三三三

震下
坎上

屯元亨利貞。

〔解〕虞翻曰。剛柔交震。故元亨之初得正。故利貞矣。

〔注〕剛柔始交。是以屯也。不交則否。故屯乃大亨也。大亨則無險。故利貞。

勿用有攸往。

〔解〕虞翻曰。之外稱往。初震得正。起之欲應動而失位。故勿用有攸往。

〔注〕往益屯也。

利建侯。

〔解〕虞翻曰：震爲侯，初剛難拔，故利以建侯。老子曰：善建者不拔也。

〔注〕得主則定。

象曰：屯，剛柔始交而難生。

〔解〕虞翻曰：乾剛坤柔，坎二始交初，故始交，確乎難拔，故難生也。崔憬曰：十二月，陽始浸長而交于陰，故曰剛柔始交，萬物萌芽生於地中，有寒冰之難，故言難生於人事，則是運季業初之際也。

動乎險中大亨貞。

〔解〕荀爽曰：物難在始生，此本坎卦也。案初六升二，九二降初，是剛柔始交也，交則成，震震爲動也，上有坎是動乎險中也，動則物通而得正，故曰動乎險中大亨貞也。

〔注〕始於險難，至於大亨而後全正，故曰屯元亨利貞。

雷雨之動滿盈。

〔解〕 荀爽曰：雷震雨潤，則萬物滿盈而生也。虞翻曰：震雷坎雨，坎爲形也。謂三已反正，成既濟，坎水流坤，故滿盈。謂雷動雨施，品物流形也。

〔注〕 雷雨之動，乃得滿盈。皆剛柔始交之所爲。

〔集解〕 周氏云：此一句覆釋亨也。萬物盈滿則亨通也。稽氏同〔疏〕

天造草昧。

〔解〕 荀爽曰：謂陽動在下，造物於冥昧之中也。

〔集解〕 鄭康成曰：造成也。草，草創。昧，味爽也。〔文選注〕 董遇曰：草昧，微物〔釋文〕

宜建侯而不寧。

〔解〕 荀爽曰：天地初開，世尙屯難，震位承乾，故宜建侯，動而遇險，故不寧也。虞翻曰：造，造生也。草，草創物也。坤冥爲昧，故天造草昧，成既濟定，故曰不寧。言寧也。干寶曰：水運將終，木德將始，殷周際也。百姓盈盈，匪君子不寧。天下既遭屯險之難，後王宜

蕩之以雷雨之政。故封諸侯以寧之也。

〔注〕屯體不寧。故利建侯也。屯者。天地造始之時也。造物之始。始於冥昧。故曰草昧也。處造始之時。所宜之莫善建侯也。

〔集解〕鄭康成曰。而讀曰能。能猶安也。〔釋文〕

象曰。雲雷屯。

〔解〕九家易曰。雷雨者。興養萬物。今言屯者。十二月雷伏藏地中。未得動出。雖有雲雨。非時長育。故言屯也。

君子以經綸。〔釋文〕論音倫。鄭如字。本亦作綸。

〔解〕荀爽曰。屯難之代。萬事失正。經者。常也。綸者。理也。君子以經綸。不失常道也。姚信曰。經。緯也。時在屯難。是天地經綸之日。故君子法之。須經綸艱難也。

〔注〕君子經綸之時。

〔集解〕鄭康成曰。謂論撰書禮樂。施政事。〔釋文〕姚信曰。綸。謂綱也。〔疏〕黃穎曰。經。綸。匡濟也。〔釋文〕李氏曰。雲。陰也。雷。陽也。陰陽二氣。相激薄而未通。感情不相得。故難生也。君子處屯難之時。不得安然無事。經營綸理。以輔屯難也。〔口訣義〕

初九。磐桓。利居貞。利建侯。

〔釋文〕磐本亦作盤。又作槃。

〔解〕

虞翻曰：震起艮止，動乎險中，故盤桓得正。得民，故利居貞。謂君子居其室，慎密而不出也。

〔注〕

處屯之初，動則難生，不可以進，故磐桓也。處此時也，其利安在？不唯居貞建侯乎？夫息亂以靜，守靜以侯，安民在正。宏正在謙，屯難之世，陰求於陽，弱求於強，民思其主之時也。初處其首而又下焉，爻備斯義，宜其得民也。

〔集解〕

馬融曰：盤桓，旋也。〔釋文〕

象曰：雖磐桓，志行正也。

〔解〕

荀爽曰：盤桓者，動而退也。謂陽從二動而退居初，雖盤桓得其正也。

〔注〕

不可以進，故磐桓也。非爲晏安，棄成務也。故雖磐桓，志行正也。

以貴下賤，大得民也。

〔解〕

荀爽曰：陽貴而陰賤，陽從二來，是以貴下賤，所以得民也。

〔注〕陽貴而陰賤也。

六二屯如遭如。

〔解〕荀爽曰：陽動而止，故屯如也。陰乘於陽，故遭如也。

〔注〕志在乎五，不從於初。屯難之時，正道未行，與初相近而不相得，困於侵害，故屯遭也。

〔集解〕子夏傳曰：如辭也。馬融曰：遭如難行不進之貌。〔并釋文〕

乘馬班如。〔釋文〕乘，繩證反。子夏傳音繩。班如，鄭本作般。〔案〕說文引易曰：乘馬驪如。

〔解〕虞翻曰：屯，遭盤桓，謂初也。震為馬，作足。二乘初，故乘馬班躩也。馬不進，故班如也。

〔注〕時方屯難，正道未通，涉遠而行，難可以進，故曰乘馬班如也。

〔集解〕子夏傳曰：班如，相牽不進貌。〔釋文〕馬融曰：班，班旋不進也。〔疏〕鄭康成曰：馬牝牡曰乘。〔釋文〕

匪寇婚媾。女子貞不字。十年乃字。〔釋文〕媾本作藹。本或作媾者非。

〔解〕虞翻曰：匪，非也。寇，謂五。坎爲寇盜，應在坎，故匪寇。陰陽德正，故婚媾。字，妊娠也。三失位，變復體離，離爲女子，爲大腹。故稱字。今失位爲坤，離象不見，故女子貞不字。坤數十三，動反正，離女大腹，故十年反常乃字。謂成既濟定也。

〔注〕寇，謂初也。无初之難，則與五婚矣。故曰匪寇婚媾也。志在於五，不從於初，故曰女子貞不字也。屯難之世，勢不過十年者也。十年則反常，反常則本志斯獲矣。故曰十年乃字。

〔集解〕馬融曰：重婚曰媾。鄭康成曰：尋猶會也。〔并釋文〕

象曰：六二之難，乘剛也。

〔解〕崔憬曰：下乘初九，故爲之難也。

十年乃字，反常也。

〔解〕九家易曰：陰出於坤，今還爲坤，故曰反常也。陰出於坤，謂乾再索而得坎，今變成震，中有坤體，故言陰出於坤，今還於坤，謂二從初卽逆，應五順也。去逆就順，陰陽道正，乃能長養，故曰十年乃字。

六三，卽鹿无虞，惟入於林中。〔釋文〕卽鹿，王肅作麓。

〔解〕

虞翻曰。卽就也。虞謂虞人掌禽獸者。艮爲山。山足稱麓。麓林也。三變體坎。坎爲藜木。山下故稱林中。坤爲兜虎。震爲麋鹿。又爲驚走。艮爲狐狼。三變禽走入於林中。故曰卽鹿无虞。惟入林中矣。

〔注〕

三旣近五而無寇難。四雖比五。其志在初。不妨已路。可以進而无屯。邇也。見路之易。不揆其志。五應在二。往必不納。何異无虞以從禽乎。雖見其禽。而无其虞。徒入於林中。其可獲乎。

〔集解〕

王肅曰。麓山足也。〔釋文〕

君子幾不如舍。往吝。

〔釋文〕幾。徐音祈。辭也。又音機。近也。速也。鄭作機。舍。式夜反。徐音捨。吝。力刃反。又力慎反。

〔解〕

虞翻曰。君子謂陽已正位。幾近舍。置吝疵也。三應於上。之。應歷險。不可以往。動如失位。故不如舍之。往必吝窮矣。

〔注〕

幾。辭也。夫君子之動。豈取恨辱哉。故不如舍。往吝窮也。

〔集解〕

馬融曰。吝。恨也。鄭康成曰。機。弩牙也。〔并釋文〕王弼曰。見情者獲。直往卽違。〔口訣義〕

象曰。卽鹿无虞。以從禽也。

〔釋文〕以從如字。鄭黃子用反。

〔解〕

案白虎通云。禽者何。鳥獸之總名。爲人所禽制也。卽此卦九五爻辭。王用三驅。失前禽。是其義也。

君子舍之往吝窮也。

〔解〕崔憬曰：君子見動之微，逆知无虞，則不如舍勿往，往必吝窮也。

六四乘馬班如。

〔解〕虞翻曰：謂三已變坎爲馬，故曰乘馬。馬在險中，故班如也。或說乘初，初爲建侯，安得乘之也。

求婚媾，往吉无不利。

〔解〕崔憬曰：屯難之時，勿用攸往，初雖作應，班如不進，既比於五，來求婚，男求女，往吉无不利。

〔注〕二雖比初，執貞不從，不害已志者也。求與合好，往必見納矣，故曰往吉无不利。

象曰：求而往，明也。

〔解〕虞翻曰：之外稱往，體離故明也。

〔注〕見彼之情狀也。

九五屯其膏。

〔解〕虞翻曰。坎雨稱膏。詩云。陰雨膏之。是其義也。

小貞吉。大貞凶。

〔解〕崔憬曰。得屯難之宜。有膏澤之惠。謂與四為婚媾。施雖未光。小貞之道也。故吉。至於遠求嘉偶。以行大正。赴二之應。冒難攸往。固宜。且猶病諸凶。故曰大貞凶也。

〔注〕處屯難之時。居尊位之上。不能恢宏博施。无物不與。拯濟微滯。亨于羣小。而繫應在二。屯難其膏。非能光其施者也。固志同好。不容他問。小貞之吉。大貞之凶。

象曰。屯其膏。施未光也。

〔解〕虞翻曰。陽陷陰中。故未光也。

上六乘馬班如。

〔解〕虞翻曰。乘五。坎爲馬。震爲行。艮爲止。馬行而止。故班如也。

泣血漣如。案漣說文引作漣。

〔解〕九家易曰。上六乘陽。故班如也。下二四爻。雖亦乘陽。皆更得承五。憂解難除。今上无所復承。憂難不解。故泣血漣如也。體坎爲血。伏離爲目。牙艮爲手。掩目流血。泣之象也。

〔注〕處險難之極。下无應授。進无所適。雖比於五。五屯其膏。不與相得。居不獲安。行无所適。窮困闔厄。无所委仰。故泣血漣如。

象曰。泣血漣如。何可長也。

〔解〕虞翻曰。謂三變時。離爲目。坎爲血。震爲出。血流出口。故泣血漣如。柔乘於剛。故不可長也。

三三三
坎下
艮上

蒙亨。

〔解〕虞翻曰。艮三之二。亨爲二。震剛柔接。故亨。蒙以亨通行時中也。干寶曰。蒙者。離宮陰也。世在四八月之時。降陽布德。齊麥並生。而息來在寅。故蒙於世爲八月。於消息爲正月卦也。正月之時。陽氣上達。故屯爲物之始生。蒙爲物之穉也。施之於人。則童

蒙也。苟得其運。雖蒙必亨。故曰蒙亨。此蓋以寄成王之遭周公也。

〔集解〕蒙者。蒙蒙物初生形。是其未開著之名也。人幼稚曰童。未冠之稱。亨者陽也。〔公羊疏〕

匪我求童蒙。童蒙求我。〔釋文〕童。字書作僮。

〔解〕虞翻曰。童蒙謂五。艮為童蒙。我謂二也。震為動起。嫌求之五。故曰匪我求童蒙。五陰求陽。故童蒙求我。志應也。艮為求。二體師象。坎為經。謂禮有來學。無往教。陸績曰。六五陰爻在蒙。暗蒙又體艮。少男。故曰童蒙。

〔集解〕鄭康成曰。牙體震而得中。嘉會禮通。陽自動其中。德於地道之上。萬物應之而萌芽生。教授之師取象焉。修道執于其室。而童蒙者求為之弟子。非已乎求之也。〔公羊疏〕又曰。童未冠之稱。〔釋文〕

初筮告。再三瀆。瀆則不告。〔釋文〕三。息暫反。又如字。〔案〕說文引作再三瀆。

〔解〕崔憬曰。初筮謂六五。求決於九二。二則告之。再三瀆。謂三應于上。四隔于二。與二為瀆。故二不告也。瀆。古黷字也。

〔注〕筮者。決疑之物也。童蒙之來求我。欲決所疑也。決之不一。不知所從。則復惑也。故初筮則告。再三則瀆。瀆蒙也。能為初筮。其惟二乎。以剛處中。能斷夫疑者也。

〔集解〕鄭康成曰。筮。問也。瀆。褻也。弟子初問。則告之以事義。不思其三隅。相況以反解而筮者。此勤師而功寡。學者之災也。瀆筮則不復告。欲令思而得之。亦所以利義而幹事也。〔公羊疏〕

利貞。

〔解〕虞翻曰。二五失位。利變之正。故利貞。

〔注〕蒙之所利。乃利正也。夫明莫若聖。昧莫若蒙。蒙以養正。乃聖功也。然則養正以明。失其道矣。

彖曰。蒙。山下有險。險而止。蒙。

〔解〕侯果曰。艮爲山。坎爲險。是山下有險。險被山止。止則未通。蒙昧之象也。

〔注〕退則困險。進則闔山。不知所適。蒙之義也。

〔集解〕楊又曰。險而止。山也。險而動。泉也。動靜皆蒙險。〔御覽〕

蒙亨。以亨行。時中也。〔釋文〕時中。張仲反。又如字。和也。

〔解〕荀爽曰。此本艮卦也。案二進居三。三降居二。剛柔得中。故能通發蒙時。令得時中矣。故曰蒙亨。以亨行。時中也。

〔注〕時之所願，惟願亨也。以亨行之，得時中也。

匪我求童蒙，童蒙求我，志應也。〔釋文〕求我，一本來求我。

〔解〕荀爽曰：二與五志相應也。

〔注〕我謂非童蒙者也，非童蒙者，即陽也。凡不識者求問，識者不求所告，闇者求明，明者不諳於闇，故蒙之為義，匪我求童蒙，童蒙求我也。童蒙之來求我，志應故也。

初筮告，以剛中也。

〔解〕崔憬曰：以二剛中能發於蒙也。

〔注〕謂二也，二為衆陰之主也。无剛失中，何繇得初筮之告乎。

再三瀆瀆，則不告，瀆蒙也。

〔解〕荀爽曰：再三，謂三與四也，皆乘陽不敬，故曰瀆瀆不能尊陽，蒙氣不除，故曰瀆蒙也。

蒙以養正，聖功也。

〔解〕虞翻曰：體頤故養。五多功，聖謂二。二志應五，變得正而忘其蒙，故聖功也。千寶曰：武王之崩，年九十三矣，而成王八歲，言天後成王之年，將以養公正之道，而成三聖之功。

象曰：山下出泉，蒙。

〔解〕虞翻曰：艮爲山，震爲出，坎象流出，故山下出泉。

〔注〕山下出泉，未知所適，蒙之象也。

君子以果行育德。

〔解〕虞翻曰：君子爲二，艮爲果，震爲行，育養也。二至上有頤養象，故以果行育德也。

〔注〕果行者，初筮之義也。育德者，養正之功也。

初六：發蒙，利用刑人，用說桎梏，以往吝。

〔釋文〕說，吐活反。徐又音稅。〔案〕說文引作以往遴，遴，行難也。凡易內往吝，往見吝，以往吝，皆當從此。非悔吝之字也。說文又引作以往吝者，意後人所增。